

Izjava OHR-a na konferenciji za medije međunarodnih organizacija u Mostaru

Parlamentarci moraju misliti na dobrobit građana, a ne na svoju ličnu

Administrativna komisija Zastupničkog doma Parlamenta BiH sastat će se sutra kako bi se razgovaralo o Zakonu o pravima i obavezama predstavnika i delegata u Parlamentarnoj skupštini BiH.

Ovaj zakon, koji bi članovima Parlamenta donio uplate za penzije i druge beneficije u iznosima znatno većim od onih koje uživaju drugi građani, već je postao predmetom nezadovoljstva kod ljudi. Kritičari postavljaju pitanje jesu li parlamentarci *zaslužili* pravo da sebi osiguraju darežljive penzije i druge beneficije u odnosu na ono što ostali građani mogu očekivati da će dobiti. Članovi Parlamenta na to pitanje do sada nisu pružili zadovoljavajući odgovor.

Zapravo, ukoliko u obzir uzmemo rad parlamentaraca posljednjih mjeseci možemo primijetiti očitu potrebu za povećanjem produktivnosti. 24. maja Visoki predstavnik predložio je Parlamentu zakone koji bi se mogli donijeti prije oktobarskih izbora. Zakoni koji su navedeni donijeli bi prave koristi građanima Bosne i Hercegovine, u mnogim slučajevima čak i u vrlo kratkom vremenskom roku. Zakon o visokom obrazovanju uskladit će standarde za studije i ispite širom univerziteta u BiH, što je preduvjet za bolonjski proces; Zakon o obligacijama modernizirat će poslovni kodeks i time potaknuti ulaganja i pomoći u otvaranju radnih mjesta; zakon o centralizaciji bankarskog sistema zaštitit će štednju malih deponenata. Zakon o farmaceutskim proizvodima stvorit će uvjete u kojima se na ispravan način može kontrolirati

kvaliteta lijekova dostupnih u BiH i određivati njihova cijena.

S izuzetkom zakašnjelog napretka u pogledu Zakona o farmaceutskim proizvodima, Parlament (isti onaj koji trenutno razmatra poboljšanje beneficija za svoje članove) nije postigao napredak u vezi s ovima zakonima koji će biti od koristi građanima.

Još uvijek ima vremena. Parlamentarci još uvijek imaju moć donijeti korist građanima BiH prije oktobarskih izbora.

Ali to će uspjeti samo ako se fokusiraju na dobrobiti građana, a ne na svoju ličnu.